




# ANG *Paghimakas*

PAHAYAGAN SANG PARTIDO KOMUNISTA SANG PILIPINAS ★ ISLA SANG NEGROS

GINAUBAYAN SANG MARXISMO-LENINISMO-MAOISMO

DISYEMBRE 2023  
ISPESYAL NGA ISYU

**Isulong ang inaway  
banwa nga may  
bag-o nga kusog!  
Makahason nga  
ipatuman ang mga  
mahangkaton  
nga hilikuton  
sa ika-55  
nga tuig  
sang Partido!**



*Komiteng Rehiyunal sang Partido sa Isla sang Negros  
Disyembre 26, 2023*

ANG KOMITENG REHIYUNAL SANG PARTIDO sa Isla sang Negros (KRPIN) nagapanginbulahan sa tanan nga mga kadre kag katapu sang Partido sa isla, tanan nga mga Pulang kumander kag hangaway sa lima ka larangan gerilya idalum sa Apolinario Gatmaitan Command-New People's Army Negros Island Regional Operations Command (AGC-NPA), mga alyadong pwersa sang National Democratic Front (NDF)-Negros kag sa bug-os nga pumuluyong pigos kag ginahimuslan sa isla sa tian sang ika-55 nga pagsukat sang liwat nga pagkatukod sang Communist Party of the Philippines (CPP) sa ila maisog nga pagpakigbahin kag pag-amot sa kabuhi kag kamatayon nga pagpakig-away agud mapangibabawan ang kontra-rebolusyonaryong kampanya sang inutil kag korap nga rehimen US-Marcos Jr sini nga tuig.

Lubos man namon nga ginabayaw ang amon tuo nga mga inumol tanda sang mapula kag militante nga pagsaludo sa tanan nga mga rebolusyonaryong martir kag baganihan nga naghalad sang ila bilidhon nga kabuhi agud matungdan ang mga hilikuton sa rebolusyon nga naghatag sang dugang kahulugan sa aton maragtason nga selebrasyon subong, ilabi na ang namartir nga sekretaryo sang KRPIN nga si Rogelio Posadas (Ka Cocoy). Maisog nga ginatubang sang aton mga rebolusyonaryong martir kag baganihan ang pasistang kaaway nga wala nagbuhi sang ila mga prinsipyo kag sinumpaang sa Partido bisan pa sa katapusan nga pitik sang ila mga pulso. Ginapasidunggan man naton ang mga rebolusyonaryong masa nga nagbuhis sang ila kabuhi sa pagsulong sa demokratiko nga rebolusyon sang banwa kag armadong paghimakas.

Ginaselebrar naton ang ika-55 nga anibersaryo sang Partido nga puno sang rebolusyonaryong optimismo bangud sang aton mga naani nga mga kadalag-an sa patag sang ideolohiya, pulitika kag organisasyon sa pihak sang mga unos nga aton gin-

atubang sa ini nga tuig. Kadungan man sini ang pagpunpon sang aton mga kahuyangan kag kasaypanan nga makuhaan sang mga bulawanon nga leksyon nga magaserbi nga iwag sa pagpa-abante sa pangmalawigon nga inaway banwa sa mas mataas

nga halintang. Pursigido kita nga ipatuman ang mga rebolusyonaryong hilikuton, dugang nga pangibabawan ang mga kahuyangan, kag maisog kag militante nga atubangon ang mas daku nga mga hangkat sa masunod nga mga panag-on.

## I. Puno sa kaakig ang pumuluyong Negrosanon sa rehimen US-Marcos II

PADAYON NGA NAGA-USMOD ANG SISTEMANG mala-pyudal kag mala-kolonyal sa paghari sang ilehitimo nga rehimen US-Marcos II. Si Ferdinand Marcos Jr, kasubong sang iya amay nga diktador, ang lubos nga papet sang imperyalismong US. Maathag ini dira sa todo nga pagpatuman sa mga gin-imposar sang US nga mga neoliberal nga mga palisiya sang pribatisasyon, deregulasyon kag liberalisasyon. Gani may plano naman ang hubon Marcos-Romualdez nga iduso ang pagbag-o sang sandigan nga laye sang pungsod agud dugang mabuksan ang aton ekonomiya sa interes sang dumuluong.

Ginahingalitan man sang US ang hambalanon sang pagdependa sang soberanya sang Pilipinas dira sa West Philippine Sea agud ipiton ang China nga kaaway ini nga imperyalistang pungsod. Ginapadasig ang paglutos sa CPP-NPA-NDFP agud magamit ang reaksyonaryong armadong pwersa para sa naga-init nga inter-imperyalista nga kinagamo. Apang, nahibaloan sang US nga napagkit na sa kasaysayan nga ang pag-singki sang imperyalistang banggianay ang matambok nga kondisyon nga nagatuga sang pagpanumbalik sa proletaryado nga rebolusyon sa bug-os kalibutan.


Ang pagbiak sang alyansa sang mga Marcos kag Duterte ang tuga man sang inaway sang

ila mga imperyalista nga amo. Ang pagsikway ni Marcos sang mga proyekto sang China nga ang mga Duterte ang may daku nga *kickback*, sa aktwal pabor man sa mga imbestor sang US kag mga kahimbon sini nga mga pungsod kaangay sang Japan kag Australia. Yara man ang internal nga indisanay sang duha ka hubon sa paghugakom sang manggad kag gahum. Mansig maniobra sa pulitika pareho sa pagpasulod sa International Criminal Court kaangot sa *drug war* ni Duterte kag paghulag para sa destabilisasyon sang administrasyon Marcos, ilabi na nga nagalapit ang eleksyon sa 2025.

Nasalamin sa isla sang Negros ang mala-pyudal kag mala-kolonyal nga sistema sa Pilipinas. Nagpabilin nga atrasado ang ekonomiya nga nagasandig sa *monocrop* nga industriya sang kalamay. Ang masobra 330,000 ka mga mamumugon sa katubhan sa Negros, lakip na ang halos 5,000 ka mga sakada halin sa iban nga probinsya, ang organisado sa produksyon sang tubo apang nagagamit sa gihapon sang ispading, guna, karabaw kag iban pa nga mga atrasado nga kagamitan. Kon yara man sang mga katubhan nga nagagamit sang traktora kag iban pa nga mga mekanisado nga kagamitan, pipila lang ini kag indi mekanisado ang bug-os nga proseso sang


produksyon. Kadam-an sa mga mamumugon sa katubhan ang nahigot sa mapiguson nga sistemang pakyaw, tuman ka nubo nga sweldo, wala sang benepisyo, mapiguson nga kahimtang sa pagobra, kag kontraktwalisasyon. Sa mga sentrales sa Negros, ang ginabulubanta 15,000 ka mga mamumugon (62.5% sa bilog pungsod) ang nag-antus man sa manubo nga sweldo. Masami sa


DISYEMBRE 2023  
ISPESYAL NGA ISYU



ANG *Paghimakas*

Nagapasalamat ang *Ang Paghimakas* sa mga kontribusyon agud mangin madinalag-on ang ini nga isyu. Sa pagpauswag sang aton *Ang Paghimakas*, ginapangabay sa tanan nga bumalasa nga padayon nga mag-amot sang mga balita, piktyur, istorya kag iban pa nga sinulat. Nagapangayo man kami sang inyo mga suhestyon kag komentaryo paano pa gid ini pauswagon.

 angpaghimakas@protonmail.com

 negrosrevportal.wordpress.com



ila mga kontraktwal kag wala sang benepisyo.

Ang malapad nga mga asyenda nga masobra 220,000 ka ektarya sa bilog isla kag 13 ka mga sentrales ang gina-uyatan sang mga dalagku nga komprador pareho sa mga pamilya Tan, Chan, Lopez kag Gokongwei kakonsabo ang mga daan nga asyendero nga pamilya sang mga Lacson, Marañon, Ledesma, Zayco, Peña, Alvarez, Tevez kag iban pa. Sila man sa gihapon ang mga dalagku nga *trader* nga nagabaligya sang kalamay pakadto sa lokal nga merkado kag para sa eksport. Nagaentra man sila sa aryendo kag usura para dugang makuha ang duta sang mga mangunguma. Sila ang halos 15% sang mga nagproduksyon sang tubo, apang ginamonopolyo nila ang 61% sa duta nga ginatamnan sang tubo. Buot singganon, ang bug-os nga industriya sang kalamay yara sa kamot sang mga dalagku komprador burgesya kag burukrata-

agalon mayduta.

Kabaliskaran sa mga magagmay nga mga *planter* (ang mga nagapanag-iya sang lima ka ektarya ukon mas nubo pa) nga sobra 85%, apang 39% lang sang kadutaan ang ila ginapanag-iya. Ang mga magagmay nga *planter* ang nabug-atan sa nagataas nga presyo sang gatong kag abono luwas pa sa subong nga tiempo sang El Niño dira sa ila panikasog nga makabawi sa ila pagtanom sang tubo.

Tuga sang *neoliberal* nga palisiya nga liberalisasyon sa agrikultura, partikular sa kalamay, ang pagbaha sang *imported* nga kalamay sa pungsod nga nagresulta sa malala nga krisis sa industriya sang kalamay. Bisan tuod nagareklamo ang mga dalagku nga *planter* nga nagakaputo sa subong nga kahimtangan, sa aktwal nagnubo lang ang daku-daku nila nga kita. Ang matuod nga apektado ang mga magagmay nga *planter* nga nalubong


sa utang tungod sa kamahal sa produksyon. Madamu sang mga magagmay nga *planter* ang nabangkarote, nadulaan sang ila duta kag nangin mga mamumugon sa kampo. Nagnubo man ang ila estado sang palangabuhian bangud nahigot sila sa dalagku nga utang, ariendo, prenda kag iban pa nga mga malapyudal nga pamaagi sa pagpanghimulos. Mas labaw pa ang sitwasyon sang mga mamumugon sa katubhan, sa ila ginbawi ang kapyerdihan sang mga asyendero paagi sa grabe ka nubo nga sweldo, wala benepisyo kag patay-patay nga pag-obra, kag tuman ka taas nga presyo sang mga balaklon.

Bangud sang krisis sa kalamay, ang mga dalagku nga agalon mayduta nagpatuman sang "*land use conversion*" (ginkumbertir ang mga katubhan pakadto sa pangkomersyal nga gamit, *solar farms*, *real estate*, eko-turismo, kag iban pa), "*crop conversion*" (imbes nga tubo, nagtanom sang mga tanom nga ginademanda sang pangkalibutanon nga kapitalistang merkado kaangay sa kape, cacao, saging, palm oil kag iban pa) samtang nagapadayon sa pagpuga sang kita sa industriya sang kalamay.

Wala pa sang kabulusgan ang mga dalagku komprador kag agalon mayduta sa paghugakom sang kadutaan sa isla sang Negros kahimbon ang mga lokal nga pulitiko kag mga ahensya sang reaksyonaryong gobyerno. Sa Negros Occidental, sandig sa datos sang reaksyonaryo nga gobyerno, may kabilogan nga 235,725 ka ektarya nga dapat ginpanagtag sang paltik nga reporma sa duta. Sa subong, may ara pa sang 30,311 nga wala pa napanagtag. Sa una nga pagtanaw, gamay nalang ang porsyento sang wala napanagtag, pero sa likod sina, wala na sa kamot sang mga Agrarian Reform Beneficiary







(ARB) ang duta. Sadto pa lang 2013 sa Negros Occidental, 70% sang kadutaan sang mga ARB nagbalik na sa kontrol sang agalon mayduta.

Ginapalala pa ang ini nga sitwasyon sa pagpatuman sang Department of Agrarian Reform (DAR) sang programa nga ginapaluyohan sang World Bank nga Support to Parcelization of Land for Individual Titling (SPLIT) program, kag New Agrarian Emancipation Act nga ang tinutuyo mapadali ang pagpang-agaw sang duta sang mga mangunguma. Dugang pa nga paagi sang paghugakom sang duta ang National Greening Program (NGP), Integrated Forest Management Agreement (IFMA) kag Socialized Industrial Forest Management Agreement (SIFMA) idalum sa Department of Environment and Natural Resources (DENR).

Sini nga tuig gin-anunsyo sang pamilya Consunji, ika-walo sa pinakamanggaranon sa pungsod, ang pagpuhunan sang ila kompaniya sa plantasyon sang palm oil sa Candoni, Negros Occidental nga magsakop sa 6,000 ka ektarya sang kadutaan paagi sa pag-

kombertir sa lasang pakadto sa komersyal nga plantasyon idalum sa IFMA. Samtang, sa mga banwa sang Santa Catalina, Siaton kag Basay sa Negros Oriental nagsulod man ang Midan Corporation, isa ka Koreano nga kompaniya, nga naghimo sang *mineral exploration* sa nasambit nga mga banwa.

Sa idalum sa ini nga kahimtangan sa isla sang Negros, nahalitan man ang mga mangunguma sang humay, kopra, saging, kag iban pa nga tanom. Naglala pa ang pyudal kag mala-pyudal nga pagpanghimulos sa kaumhan nga nagpalawig sang ginatawag nga tigkiriwi sa bilog tuig. Ang kagutom, pagkawalay trabaho kag manubo nga sweldo nagaduso sa mga mangunguma kag mga mamumugon sa kaumhan nga magkadto sa kasyudaran para mangita sang obra. Apang, wala tupong nga krisis ang malab-otan nila sa syudad.

Bangud sa kagustohan sang imperyalismong US nga hingalitan ang tanan nga bahin sang pungsod para sa iya nga interes, ginapatumang ang mga proyekto kaangay sang reklamasyon sa kabaybayonan sa Negros para dira iplastar ang mga pantalan, ang mga dalagku

nga mga *building* nga magakomodar sa mga opisina kag iban nga panginahanglan sang mga dumuluong, kag mga *mall* kag *deparment store* nga bagsakan sang mga *surplus* nga produkto sang mga kapitalistang pungsod pareho sang US, China kag Japan. Dira man iplastar ang mga kompaniya sang Business Process Outsourcing (BPO) nga isa man ka tipo sang pagpahimulos sa mga petiburgesya sa syudad. Sa Negros Occidental, ginapangunahan ni Mayor Albee Benitez ang plano nga himuon nga "*Super City*" ang syudad sang Bacolod nga mag-imbolbar sang halos 2,000 ka ektarya nga reklamasyon sa baybay. Kasubongman ang proyekto ni Mayor Felipe Remollo nga "*Smart City*" *reclamation* kag Pantawan 2 kag 3 nga reklamasyon sa Dumaguete City nga maglab-ot sa masobra 700 ka ektarya.

Yara man ang pagsulod sang iban nga mga dalagku nga negosyante diri sa Negros para sa pribatisasyon sang tubig kag kur-yente pareho sa kompanya sang mga Villar, Razon kag Aboitiz. Sa karon, pribado ang serbisyo sa



tubig sa Bacolod City, Himamaylan City kag Cadiz City sa Negros Occidental idalum sang Prime-water sang pamilya Villar. Ang Central Negros Electric Cooperative (CENECO) naman na-pribatista na idalum sa pamilya Razon paagi sa ila kompanya nga More Power. Imposisyon naman sang World Bank ang Jeepney Modernization Program nga ginapatuman sang rehimen US-Marcos. Magaapekto ini sa mga drayber kag magagmay nga operaytor sa bilog pungsod, lakip na diri sa Negros.

Ang resorsa sang tubig sa Negros Occidental ang nabutang naman sa peligro sa Bulk Water Project ukon mas eksakto nga tawagon nga *mega dam project* ni Gob. Eugenio Lacson sa Malogo River kag Imbang River sa norte nga bahin sang Negros, kakonsabo ang US Agency for International Development (USAID) kag Asian Development Bank (ADB) nga pondohan man sang mga dalagku nga komprador pareho sang mga Aboitiz. Imbes nga masolbar ang krisis sa tubig, mas malala pa ang epekto sini nga proyekto sa kinaiyahan kag sa palangubuhian sang pumuluyo kaangay sa mga *mega dam project* nga ginpatuman sa iban nga bahin sang pungsod.

Tuman nga kapigaduhon, kagutom, kawalay trabaho, daw ulipon nga sitwasyon sa obra, demolisyon, baha, kakulang nga serbisyo sosyal kaangay sa edukasyon kag ikaayong lawas, kag madamu pa ang ginaantus subong sang pumuluyong Negrosanon. Sandig mismo sa datos sang reaksyonaryo nga gobyerno, halos 25% (ukon isa sa kada apat nga pamilya) sang masobra 4.6 milyon nga Negrosanon ang pinakapigado nga pamilya sa isla sini nga tuig. Apektado man ang mga kabataan nga Negrosanon. Halos 6.94% ukon 23,435 ka estudyante ang

wala na nakapadayon sa pag-eskwela sini nga tuig sa Negros Occidental. Sa Bacolod City, masobra 11,000 man ang nabuhin sa mga manug-enrol.

Ginagamit sang mga dalagku nga komprador kag burukratalagalon mayduta ang ila instrumento sang pasismo diri sa isla nga amo ang Armed Forces of the Philippines 3rd Infantry Division (AFP-3rd ID), Philippine National Police (PNP) kag National Task Force (NTF)-Elcac agud ipatuman ang *de facto martial law*. Ginapatuman sini nga may impunidad ang mga *focused military operation* kag Retooled Community Support Program (RCSP) nga pasista nga legasiya man sang US-Duterte nga rehimen. Nakaposisyon karon ang pito ka batalyon sang Philippine Army idalum sa 302nd kag 303rd Brigade kag tatlo ka batalyon sang ispesyal nga pwersa sang PNP (Special Action Force, Regional Mobile Force kag Regional Public Safety) sa bilog isla nga nagasabwag sang kahalitan kag kakugmat ilabi na sa mga komu-

nidad sang mga mangunguma kag mamumugon sa uma sa kaumhan.

Pila ka pilo nga kagrabehon ang ginaantus sang mga masang Negrosanon subong kompara sa mga nagliligad. Sa tunga sa pang-ekonomiya nga krisis, nagsingki man ang mga paglapas sang tawhanon nga kinamatarung. Nangin madata ang pagpangsalbeyds, mga masaker kag abdaksyon sa bilog isla, ilabi na sa kaumhan. Idalum sa rehimen Marcos Jr, halos 600 (345 ang natabo sini nga tuig) ang mga kaso sang pagpang-abuso sang mga reaksyonaryo nga pwersa sang estado sa tawhanon nga kinamatarung sa isla nga nag-imbolbar sang lapit 40,000 ka pumuluyo sa diin masobra 300 ang mga menor de edad. Lapnagon ang iligal nga pag-aresto kag pagdetine, tortyur, pagpamahug, pagpangransak kag pagpangawat, pagpangbomba kag iban pa nga mga kalapasan nga wala-kaluoy nga ginahimo sang pasista nga militar, kapulisan kag ila mga pwersa paramilitar.

Wala-untat man ang kabutigan kag pagpaniplang sang



*Idalum sa rehimen Marcos Jr,  
halos 600 (345 ang natabo  
sini nga tuig) ang mga kaso sang  
pagpang-abuso sang mga reaksyonaryo  
nga pwersa sang estado  
sa tawhanon nga kinamatarung  
sa isla nga nag-imbolbar  
sang lapit 40,000 ka pumuluyo  
sa diin masobra 300 ang  
mga menor de edad.*



AFP/PNP/NTF-Elcac. Ila ginapilit ang naratibo nga madinalag-on ang ila kontra-insurhensya nga kampanya sa Negros paagi sa mga peke kag pilit nga mga pagpasu-render sa mga mangungugma kag mamumugon sa uma, pagpang-angkon sang mga "armado nga engkwentro" bisan sa reyalidad mga paghinabon ini sang ila mga krimen batok sa katawhan ka-angay sang mga masaker, kag mga tinikal nga "para sa pumuluyo" ang ila wala-pulos nga Barangay Development Program (BDP). Pinakaulihi nga pagpanipilang kag tinikal sang rehimen Marcos Jr amo ang bogus nga proklamasyon sang amnestiya nga ang katuyuan ang pakalmahon ang pagbato sang pumuluyo. Ang BDP, Enhanced Comprehensive Local Integration Program (ECLIP), kag mga badyet para sa NTF-Elcac sa mga lokal nga gobyerno kag ahensya ang nangin gatasan sang mga korap nga mga heneral kag burukrata sa isla. Amo nga sa likod sang pagtinikal nga "nawasak" kag "naghuyang"

na ang NPA sa isla, wala man untat ang AFP/PNP/NTF-Elcac sa pagbubo sang pondo sa kontra-insurhensya nga kampanya.

Ang nagasingki nga kontra-diksiyon sa tunga sang Marcos kag Duterte nga hubon, magatandog man sa lokal nga pulitika. Ginasakdag subong ni Gob. Lacson sang Negros Occidental kag ni Gob. Manuel Sagarbarria sang Negros Oriental, ang nagbulos sa ginpatay nga si Gob. Roel Degamo, ang pagpasar sang laye nga magatukod sa Negros Island Region agud ila maangkon ang poder sa pulitika kag mamonopolyo ang nabilin nga dunang manggad sa isla. Nagabaskog man ang impluwensya sang mga Benitez sa Bacolod City kag norte nga bahin sang isla. Dira sa banggianay sa pulitika sa tunga ni Gob. Degamo kag mag-utod nga anay Gob. Pryde Henry Tevez kag anay Congressman Arnie Tevez, ginpatay ang gobernador kag nadalahig ang siyam nga inosenteng pumuluyo sadtong Marso. Ginhingalitan man sang AFP/

PNP/NTF-Elcac ang natabo kay Degamo para mahatagan rason ang dugang militarisasyon sa bilog isla.

Ang nagaluntad nga sitwasyon ang nagapa-indakal sa bulkan sosyal sa isla sang Negros. Puno sa kaakig ang pumuluyong Negrosanon sa subong nga estado sa ila kabuhi. Ang ligal nga demokratikong kahublagan nagasulong sa interes kag kaayohan sang mga mumugon, mangunguma, mala-proletaryado kag mga petiburgesya sa kasyudaran. Madamu sa mga apektado nga sahi kag sektor ang luyag nga magpakigbahin sa armadong paghima-kas sa kaumhan kag nagasuporta sa demokratiko nga rebolusyon sang banwa. Ang mga mangu-nguma kag mamumugon sa kaumhan ang madamuan nga nakigbahin kag nagsuporta sa NPA kag sa rebolusyonaryong kahublagan. Sila ang nagapanguna nga bubon sang mga Pulang hangaway nga pamunuan sang Partido para sa pagsulong sa inaway banwa sa isla.



## II. Pagpamuno sang Partido sa kabuhi kag kamatayon nga paghimakas batok imperyalismo, pyudalismo kag burukrata kapitalismo sa isla sang Negros

LIMA NA KA TUIG SUGOD gin-imposar ang Memorandum Order (MO) 32 sa mga isla sang Negros kag Samar, kag Bicol region. Sa dalagan sang mga tinuig diin gin-pokusan ang Negros sang kontra-rebolusyon, nakaangkon ang rebolusyonaryong pwersa sa bilog isla sang mga positibo kag negatibo nga leksyon nga dapat uyatan agud mapangibabawan ang gin-pasingki nga atake sang kaaway kag mapasulong ang demokratiko nga rebolusyon sang banwa paagi sa pangmalawigon nga inaway banwa sa mas mataas nga halintang.

Sini nga tuig, namuno kag upod ang Partido sa rebolusyonaryong pwersa sa isla kag sa mga masang Negrosanon sa kabuhi kag kamatayon nga pag-atubang sa imperyalismo, pyudalismo kag burukrata kapitalismo. Apang, may mga kahuyangan sa hilikuton pang-ideolohiya, pampulitika kag pang-organisasyon nga nakabara sa mga pagsulong kag kinahanglan determinado nga solbaron kag tadlungon. Importante nga kilalahon naton ang mga kadalag-an kag kasaypanan sa nagligad tuig kag sang una pa nga katuigan. Paagi lang sa pag-uswag nga nakasandig sa mga nalab-ot nga kadalag-an kag pag-pangibabaw sa aton mga kasaypanan kag kahuyangan kita makatikang pakadto sa wala sing tupong nga halintang sang pang-Partido nga hilikuton.

Sini nga tuig, padayon kita nga nagapanday sa ideolohiya sa giya sang Marxismo-Leninismo-Maoismo (MLM). Yara ang KRPIN sa proseso sang pagsumada sa nagligad nga lima ka tuig nga sugpon sa 22 ka tuig nga sumada sang rebolusyonaryo nga eksperyensya sa isla sang Negros. Kabahin ini

sa pungsodnon nga panawagan sa paglunsar sang kahublagan panadlong para masolusyonan ang mga nakaupang sa pag-uswag kag dugang pagsulong sa pungsodnon-demokratiko nga rebolusyon sa nagligad nga pila ka tuig. Madamu pa nga mga leksyon kag esensya sa nauna nga sumada sang KRPIN nga wala pa lubos nga nahangpan kag napraktika sang mga kadre kag katapo sang Partido. Diri kita nalansang kag kinahanglan ang seryoso nga panikasog para mahilway sa mga kadena nga nagabutong sa aton paatras.

Sa pihak sang sustenido nga mga *focused military operation* sang kaaway nga pwersa sa tanan nga larangan gerilya, natigayon ang pagkonsolida sang Partido sa isa ka halintang. Matapos ang mga madinalag-on nga paghatag sang Abanteng Kurso ng Partido (AKP) sadtong 2022, matinugahon naman nga ginlunsar sang tatlo ka larangan ang pagtuon sang Batayang Kurso ng Partido (BKP) samtang may duha ka larangan nga nakahatag sa Intermedyang Kurso ng Partido (IKP). Padayon sa gihapon ang mga pang-Partido nga pagtuon partikular sa Rebolusyon, politikal nga dyornal sang Partido. May pila man nga nakatuon sa mga sinulat militar nila Mao Zedong, Zhu De kag Vo Nguyen Giap.

Positibo ang paghatag sa tatlo ka lebel sang edukasyon sang Partido kag iban pa nga pang-Partido nga pagtuon, apang kulabos ang nalab-ot nga paghangop sa kahimtangan subong sa isla tungod may pagkulang sa pagpadalom sa madamu nga natipon nga mga datos. Nagakahulugan ini nga kulang ang pag-aplikar sa teorya pakadto sa praktika kag pagpataas sini sa mas mataas nga

lebel sang teorya kag praktika.

Sa panahon subong, labi nga kinahanglan nga mapagsik sa pagbasa sa pang-ekonomiya kag pang-pulitika nga kahimtangan sa madasig nga pag-uswag sang sitwasyon ilabi na sa asud-asod nga pagpatuman sa mga *neoliberal* nga programa sa isla. Kon mahinay kita, indi epektibo nga mapamunuan kag magiyahan ang mga papakig-away sang mga masa. Isa ini sa mga rason nga ara apang maluya kag lapta-lapta ang mga paghimakas masa, kontra-pyudal nga paghimakas ilabi na sa lebel sang barangay pakadto sa rehiyunal nga kampanya, pagpatuman sa *minimum* nga reporma sa duta, kag iban pa. Gani, may kabudlayan sa paglunsar sang mga paghimakas para sa makabuhi nga sweldo kag benepisyo sang mga mamumugon kag mamumugon sa uma partikular sa balayon sang *monocrop* nga ekonomiya sang kalamay sa Negros. Daw nagapangapkap kita sa kadulom sa paglunsar sa mga kampanyang masa tungod kulabos ang hilikuton nga pangsosyedad nga imbestigasyon kag pag-analisar sang mga sahi ukon SICA. Wala nagamit ang bug-os nga masarangan sang kusog sang rebolusyonaryong baseng masa para sa pagkonsolida sa rebolusyonaryo nga gahum kag dugang nga pagpalapad. Sa lain nga paghambal, halog man ang pag-uyat sa linyang masa.

Ang nagalawig nga suhetibismo sa dagway sang empirisismo ang nagapanguna nga kahuyangan sa ideolohiya sang KRPIN kag ginsakpan sini. Nagaluntad pa gihapon ang mekanikal kag empirisita nga metodo sang pagtuon kag pagsolbar sa mga problema. Bisan pa man, nagapaninguha ang

Partido sa Negros nga matungdan ang iya nga papel sa pagpamuno sa rebolusyon sa isla agud makaamot sa pungsodnon nga paninguha sa pagsulong tubtob malabot ang bug-os nga kadalagan.

Sa pihak sang paltik nga dedalayn sang kaaway nga pulbuson ang rebolusyonaryo nga kahublagan sa isla ilabi na ang armado nga hinganiban sang Partido nga ang NPA, padayon nga nagaluntad ang rebolusyon sa Negros kag ginapangunahan sa gihapon sang NPA ang integrado nga hilikuton sang inaway banwa nga paglunsar sang armadong paghimakas, pagpatuman sang rebolusyon agraryo kag pagtukod sang baseng masa.

Apesar nga lutuson ang NPA, ginlunsar sang AFP/PNP/NTF-Elcac ang maitom nga atake sa mga komunidad sang mangu nguma kag ginhimo ang madamu nga mga paglapas sa internasyunal nga makitawhanon nga laye kag sa Comprehensive Agreement

on Respect for Human Rights and International Humanitarian Law (CARHRIHL). Sini nga tuig, 28 ka mga mangunguma kag 11 ka *hors de combat* nga mga Pulang hangaway ang tinalawan nga ginpatay sang mga pasistang pwersa sang reaksyonaryong estado. Nangin madata ang abdaksyon sa diin tubtub subong "*missing*" pa sanday Lyngrace Marturillas, Denald Mialen, Renel delos Santos kag Deah Lopez. Bantog ang makasiligni nga pagpatay sang 94th IB sa pamilya Fausto nga nagkutlo sa kabuhi sang magasawa nga mangunguma kag duha nila ka menor de edad nga kabataan sa Himamaylan City, Negros Occidental. Sini nga tuig, pinakawala-kaluoy nga hinimoan ang pagabdak, pagtortyur kag gilayon pagsalbeyds kay Rogelio Posadas (Ka Cocoy), rehiyunal nga kadre kag isa man ka NDFP peace consultant, sadtong Abril kag ang pagmasaker sa lima ka *hors de combat* (lakip na ang isa ka busong)

nga mga Pulang hangaway kag ila upod nga drayber sang traysikol sa Kabankalan City, Negros Occidental sadtong Setyembre. Ang kada mapatay kag mga brutal nga kahalitan nga ginhimo sang AFP/PNP/NTF-Elcac napagkit sa hunahuna kag tagipusuon sang masang Negrosanon kag nagadabok sa ila balatyagon nga manukot sang hustisya.

Nagdamo man sini nga tuig ang mga peke nga engkwentro nga ginagamit sa paghinabon sa mga krimen batok sa katawhan nga wala huya nga ginhimo sang mga pasista nga tropa militar. Sa idalum sang rehimen US-Marcos II, 37 ang mga peke nga engkwentro sa diin 23 ang natabo sini nga tuig (halos 2 ka peke nga engkwentro kada bulan). Ang mga peke nga engkwentro gingamit nga balibad sa mga makasiligni nga pagpatay kag pagmasaker sa mga mangunguma kag mga *hors de combat*, paslaw nga pagpatay, ilegal nga pag-aresto kag pagbilanggo, pagpangastigo, pagpangbomba, patarasak nga pagpaarak kag pag-istraping; pagtabon sa pagtirohay sa tunga sang mga militar kag pulis (*misencounter*); kag may ara man tion nga ginhimu-himo lang ukon *fake news*. Maayo ang paninguha sa tanan nga mga tigpamaba, sa rehiyunal tubtob sa lebel sang mga larangan gerilya, nga madasig nga sabton kag ibuyagyag ang mga peke nga balita kag mga malisyoso nga intriga sang makinaryas sang kabutigan kag pagpaniplang sang AFP/PNP/NTF-Elcac.

Matuod nga nakaagum sang kahalitan ang mga larangan gerilya sa isla sang Negros sa brutal kag puno sa impunidad nga kontra-insurhensya nga kampanya apang nagadamgohanon sa udtong-adlaw ang kaaway sa pagpati nga malutos ang rebolusyonaryong pwersa. Tubtub yara ang imperyalismo, pyudalismo kag burukrata kapitalismo nga basehan sang paglun-






*Sulod sa 2023:  
54 ka mga aksyon militar kag  
punitibo nga aksyon ang nalunsar  
batuk sa mga pasista nga tropa, sa  
ila mga paramilitar nga pwersa  
kag intelligence network sa bilog  
isla kag iban pa nga mga malain  
nga mga elemento*

*Pinakamadinalag-on ang ambus  
sa 10 ka elemento sang pulis sa  
Calatrava, Negros Occidental  
sadtong Agosto nga nakakuha  
sang tatlo ka M16, mga bala kag  
isa ka manubo nga armas, kag  
nagpatay sa isa ka pulis samtang  
pilason ang tatlo pa, lakip ang  
deputy chief sang pulis sa Calat-  
rava.*

*Ang mga opensiba sang NPA  
Negros sa kabilogan nakaagum  
sang 22 ka armas kag nagtuga  
sang 72 ka kaswalidad sang  
kaaway, sa diin 40 ang napatay  
sa inaway.*

tad sang rebolusyonaryong armadong paghimakas, magpabilin kag magsulong ang demokratiko nga rebolusyon sang banwa. Ang mas nagapanguna nga mga kabangdanan sa isa ka lebel nga paghuyang kag sa mga naagum nga kahalitan sang Pu- lang hukbo amo ang nagaluntad nga konserbatismo militar, pagkahalog sa disiplina militar, pagpugad sa mga konsolidado apang limitado nga ispasyo kag pagbalewala sa malapad nga mga erya nga wala pa nalab-ot, kakulang pa sa paghangop sa politiko-militar nga linya sang lapnagon kag dasok nga inaway gerilya sa nagalapad kag nagadalum nga baseng masa sa halintang sang estratehikong depensiba, kag ang pagkakampante sa lebel sang aton nalab-ot subong, indi pa bangod sa pagsingki sa dalagku kag mapintas nga atake sang kaaway. Yara man ang mabaskog nga tendensiya nga indi seryoso nga ginapalibogan ang ginaatubang nga mga sirkumstansya kag ginapakanubo ang kapasidad sang kaaway.

Bisan ano ka padayaw ang kabutigan sang kaaway, mawasak ang iya mga tinikal sa aktwal nga mga kadalag-an sa paglunsar sang inaway banwa. Padayon ang lima ka lara- ngan gerilya idalum sa AGC-NPA Negros Island sa paglun- sar sang anihilatibo kag atritibo nga mga taktikal nga opensiba kag pagpatuman sa mga punitibo nga aksyon sandig sa desisyon sang rebolusyonaryo nga korte sang pumuluyo. Sulod sa 2023, 54 ka mga aksyon militar kag punitibo nga aksyon ang nalunsar batuk sa mga pasista nga tropa, sa ila mga paramilitar nga pwersa kag *intelligence network* sa bilog isla kag iban pa nga mga malain nga mga elemento. Pinakamadinalag-on ang ambus sa 10 ka ele- mento sang pulis sa Calatrava, Negros Occidental sadtong Agosto nga nakakuha sang tatlo ka M16, mga bala kag isa ka manubo nga armas, kag nagpatay sa isa ka pulis samtang pilason ang tatlo pa, lakip ang *deputy chief* sang pulis sa Calatrava. Ang mga opensiba sang NPA Negros sa kabilogan nakaagum sang 22 ka armas kag nagtuga sang 72 ka kaswalidad sang kaaway, sa diin 40 ang napatay sa inaway.



Sa tunga sang sustenido kag dalagku nga atake sang kaaway, padayon ang paghanas pulitiko-militar sang mga Pulang kumander kag hangaway kag mga bag-o nga rekrut, kag mga *section guerrilla unit* kag yunit milisya sa kada larangan gerilya. Ginahatag ang sandigan nga kurso sa pulitiko-militar kag mga topiko sini. Sa hanay sang organisasyon masa, padayon gihapon ang paghatag sang politikal nga pagtuon sa balayon sang Pambansa-Demokratikong Paaralan (PADEPA) sa matinugahon nga paagi. Ginahatag ang *Ang Bayan* kag *Ang Paghimakas* bilang giya sa propaganda sa nagkalain-lain nga mga isyu sang sosyedad kag pag-analisar sini. Yara man ang programa sang *literacy* kag *numeracy* nga indi lang para sa mga kabataan kundi bisan sa mga may edad kag tigulang na nga wala nakatilaw sang pag-eskwela. Subongman, ginalunsar ang kampanyang masa para sa pagpauswag sa panglawas sang publiko kag sanitasyon, kag pagpataas sa produksyon sang mga mangunguma. Ginatungdan naman ang arbitrasyon kag rebolusyonaryong hustisya sa pagsolbar sa nagaluntad nga mga problema sa tunga sang malapad nga masa. Pero sa kabug-osan, minimum pa gihapon ang nalab-ot sang hilikuton masa kag kinahanglan gilayon nga masolbar ang mga kabudlayan.

Sa anti-pasista nga kampanya, nag-uswag ang pagmonitor kag pagbuyagyag sa mga paglapas sang tawhanon nga kinamatarung sang mga pasista nga reaksyonaryo nga pwera. Daku nga hangkat indi lang sa rebolusyonaryo nga pwera kundi sa mga grupo kag indibidwal nga nagasakdag sa tawhanon nga kinamatarung kag hustisya sosyal ang papaano makalab-ot sa pang-publiko nga entablado ang mga hambalanon sang anti-pasista nga panawagan kag masugpon kag mapataas pakadto



sa anti-pyudal kag anti-imperyalista nga paghimakas ilabi na subong nga sitwasyon nga sa likod sang pasista nga atake sang kaaway, yara ang mga pagpatuman sang *neoliberal* nga mga palisiya kag wala kabulusgan nga pag-agaw sang kadutaan kag pyudal kag mala-pyudal nga pagpanghimulos.

Sa kasyudaran, ang ligal nga demokratikong kahublagan ang nagakonsolida sang kusog kag nagasulong sa interes sang pumuluho. Sini nga tuig nangin kaundan sang kontra-imperyalista, kontrapyudal kag kontra-pasista nga kahublagan ang mga panawagan batok sa mga *neoliberal* nga palisiya nga ginapatuman sa isla sang Negros, interbensyon sang US kag China sa West Philippine Sea, mga makahalalit nga mina kag *quarry*, pagtaas sang presyo sang gatong kag mga adlaw-adlaw nga kinahanglanon sang pumuluho, mga reklamasyon sa baybay, pribatisasyon sang tubig kag kuryente, pag-phaseout sa mga dyip, kag mga palas-anon nga buhis sa mga sandigan nga balaklon. Ginpanawagan nila ang pagbasura sa Maharlika Investment Fund, *confidential funds* kag NTF-Elcac. Naglanog man sa bilog isla ang

pagsinggitan para sa hustisya, pagpa-untat sa militarisasyon sa kaumhan, kag pagbalik sa istoryahanay pangkalinong sa tunga sang GRP kag NDFP. Nagpakigugyon man ang hayag nga kahublagan masa sa bilog kalibutan sa panawagan nga untaton ang pagpanghimulos sa pumuluhyong Palestino kag tapuson na sang Israel ang pagsakop sa Gaza.

Ang mga aktibista kag progresibo nga grupo nangin *target* sang reaksyonaryo nga estado kag biktima sila sang *red-tagging*, *sar-beylans*, *abdaksyon*, *pagpamahug* kag *harassment*, kag iban pa tungod sa ila pagbato kag pagbuyagyag sa mga problema sang sosyedad. Bisan pa man, wala sila nagpadaug sa kahadlok kag gapaninguha para sa mas dalagku nga rehiyonal nga kampanya kaangay sang paghimakas para sa makabuhi nga sweldo kag benepisyo sang mga mamumugon kag mamumugon sa uma, kag pag-atubang sa mga nagkalain-lain nga mga *neoliberal* nga atake sa kasyudaran kag kaumhan. Ang subong nga natipon nga kusog kinahanglan magamit para sa dugang pagpukaw, pag-organisa kag pagpahulag sang malapad nga pumuluhyong Negrosanon. Mangin





pwersa ini sa dugang pagpalapad kag pagkonsolida.

Signipikante ang natampo sa mga tawong simbahan sini nga tuig sa pagpasanyog sa mga isyu sang pumuluyo. Indi malipatan ang maragtason nga papel sang sektor sang simbahan halin pa sa dekada '70 diri sa Negros. Kaangay sang nagliligad, dapat mag-ululupod ang tanan nga mga demokratikong sektor, ilabi na ang mga mamumugon kag pamatan-on, agud makaabante ang kahublagan masa sa kasyudaran nga katimbang sa armado nga paghimakas sa kaumahan bilang panguna nga porma sang paghimakas.

Ang Partido ang nagapamuno nga pwersa sa ligal nga demokratiko nga kahublagan sa kasyudaran kag nagadumala sa pagangot sa kahublagan sa kasyudaran kag kaumhan. Ang nagaluntad nga sulog sang tuo nga oportunismo kag repormismo sa sulod mismo sa mga organisasyon sang Partido sa kasyudaran kinahanglan pamatukan kag lubos nga mapangibabawan agud mapataas ang kapasidad nga ipakig-away ang demokratiko nga kinamatarung kag kaayohan sang pu-

muluyo kag mapauswag ang militante nga metodo kag istilo sa pagtrabaho sa mga rebolusyonaryong hilikuton. Dira kita mas mangin epektibo sa pangpamuno sa masa.

Makitid pa ang nagahiliugyon nga prente sa Negros sa panahon nga madata ang *neoliberal* nga atake, nagalala ang katilingbanon kag pang-ekonomiya nga sitwasyon sang mga ginapigos kag ginahimuslan nga mga sahi kag sektor, kag sa pagsingki sa pasismo kag terorismo sang reaksyonaryo nga estado. Ang pinakamalapad nga naghiliugyon nga prente sang mga ginapigos kag ginahimuslan sa sosyedad ang may kapasidad nga epektibo nga ihamulag kag pahuyangon ang kaaway. Sa pagpamuno sang Partido, ang nagahiliugyon nga prente magasuporta nagapanguna sa rebolusyonaryo nga armadong paghimakas kag dugang nga magapukaw kag magapahulag sa madamu nga isip sang pumuluyo nga lagpas pa sa rebolusyonaryo nga organisadong pwersa dira sa pagpakigbahin sa pungsudnon-demokratiko nga kahublagan.

Padayon nga malig-on kag

hugot ang paghiliusa sang mga kadre sang KRPIN kag sang bug-os katapuan sang Partido sa isla sang Negros sandig sa prinsipyo sang demokratikong sentralismo. May namartir man nga mga rehiyunal nga kadre kag iban pa nga mga kaupod sini nga tuig, apang ang mga nagpabilin sa nagkalain-lain nga lebel ang handa nga magsunod sa mga katungdanan kag, sa inspirasyon sang mga rebolusyonaryong martir kag baganihan, dugang nga manikasog agud tumanon ang mga rebolusyonaryo nga hilikuton. Wala sang paghubas ang bubon sang Partido sa hanay sang mga mamumugon, mangunguma, kababainhan, pamatan-on kag iban pa nga mga sektor. Ginapauswag ang tagsa-tagsa nga kapasidad sa pagpamuno paagi sa mga kurso sang pagtuon kag paghanas kag sa kolektibo nga paghikot kag pagtungod sa indibidwal nga katungdanan dira sa rebolusyonaryo nga paghimakas masa. Dugang man nga ginapahugot ang paghiliusa sang kada katapo sang Partido sa pagpatuman sang mga pagsaway kag pagsaway sa kaugalingon.

### III. Determinado ang bilog katapuan sang Partido sa Negros sa pagpanadlong sa mga kasaypanan kag dugang pagpabakud sa Partido

IDALUM SA PAGPAMUNO SANG PARTIDO sa Negros, napangibabawan sang rebolusyonaryong pwersa sa isla ang kampanya sang pagpanumpo sang nagahari nga sahi sini nga tuig. Bastante ang rebolusyonaryong kusog para sa pagbanganon halin sa mga pag-atras kag paghuyang agud mapataas pa ang nalab-ot nga mga rebolusyonaryong kadalag-an sa ideolohiya, pulitika kag organisasyon. Sa espiritu sang Ikaduha nga Dungganan nga Kahublagan Panadlong sa diin halin sa kusog-platun sadtong 1994 nagdamo sa pila ka pilo ang NPA sa Negros kag nagbaskog liwat ang rebolusyonaryong pwersa paagi sa pagpanindugan sa husto nga linya kag pagtadlong sa sayop, kasubong man nga determinado ang

subong nga mga rebolusyonaryong pwersa upod ang pumuluyong Negrosanon sa pagpatuman sa panawagan sang Komite Sentral sa paglunsar sang Ikatatlo nga Dungganan nga Kahublagan Panadlong kag dugang pagpabakud sa Partido.

#### **1. Konsolidahon ang Partido sa Marxismo-Leninismo-Maoismo! Pursigido nga ilunsar ang kahublagan panadlong!**

Desidido nga awayon ang suhetibismo sa dagway sang empirismo. Kinahanglan ipursige ang pagtapos sa lima ka tuig nga pagsumada sa rebolusyonaryong eksperyensya sa isla kag gilayon ipalapnag sa bilog katapuan sang Partido sa Negros agud mangin giya sa pagpanadlong kag pagpauuswag sa mga rebolusyonaryong

hilikuton. Ang subong nga kahublagan panadlong ang komprehensibo nga magpabakud sa Partido, lakip na sa organisasyon. Busa kinahanglan manikasog sa pagpangibabaw sa mga kahuyangan kag pag-atras kag mangin mapagsik sa mga rebolusyonaryong hilikuton kag katungdanan.

Isikway ang mekanikal nga estilo kag metodo sa pagtuon kag pagtrabaho paagi sa maalamon nga pag-aplikar sang MLM sa kongkreto nga kahimtangan kag pagpauuswag sa rebolusyonaryo nga praktika. Kinahanglan sini ang regular nga pagtasa sa plano kag programa sang Partido sa kada lebel kag ebalwasyon sang mga kadre kag yabe nga hilikuton. Regular man nga maglunsar sang pagsaway kag pagsaway sa kaugalingon para magpabilin nga mabakud ang paghiliusa kag matumod ang mga kasaypanan kag kahuyangan. Ang paghiwat sang mga kumperensya kaangot sa partikular nga mga rebolusyonaryong hilikuton ang isa man ka madasig nga paagi sa pagbaylohanay sang eksperyensya kag pagkuha sang leksyon.

Hikuton ang pagpapreska sa SICA halin pa sa nagligad nga mga tuig sa tanan nga halintang, sugod sa baryo tubtob sa rehiyunal nga lebel. Mangin basehan ini sa matinugahon nga pagpukaw, pagorganisa kag pagpahulag sa mga masa kag sa malaparon nga paglunsar sang kontra-imperyalista, kontra-pyudal kag kontra-pasista nga mga kampanya. Paagi sini maangkon man ang malapit nga angot sa mga masa kag mangin maayo sa hilikuton masa.

Mangin matinugahon sa paglunsar sang tatlo ka lebel nga kurso sang Partido sa pihak sang daku





kag lapnagon nga atake militar sang kaaway. Maghimo sang plano para sa edukasyon kag paghanas sa mga kadre kag hingalitan ang tanan nga mga oportunidad para mapatuman ini.

Padayon nga pabakuron ang pagpamuno sang Partido nga madalum nga nakaugat sa mga masang anakbalhas. Lab-oton ang gintumod nga kadamuon sang rekrut sa Partido halin sa mga abanse nga aktibista samtang muklat nga indi magpasulod sang mga malain nga elemento. Atipanon man ang pagproseso sa lubos nga pagpasakop sang mga kandidato nga sakop sang Partido sandig sa kasuguan sang Konstitusyon sang Partido. Tukuron man ang madamu nga mga sanga kag grupo sang Partido sa kaumahan kag kasyudaran samtang ginarekober, ginapaaktibo liwat, kag ginakonsolida ang mga nagaluntad.

Magpatuhaw sang dugang nga mga kadre sang Partido para sa nagkalain-lain nga mga hilikuton sa rebolusyon. Kilalahon ang indi patas nga pag-uswag sang katapoan sang Partido kag paagi sini magbuligay sa pagpataas sang rebolusyonaryo nga kamuklatan kag kapasidad sang isa kag isa agud malab-ot ang pangkabilogan nga lebel sang pagsulong.

## **2. Absoluto nga pamunuan sang Partido ang NPA sa pagsulong sa demokratiko nga rebolusyon sang banwa!**

Bilang abante nga destakamento sang sahing mamumugon, ginapamunuan sang CPP ang paglunsar sang demokratiko nga rebolusyon sang banwa paagi sa pangmalawigon nga inaway banwa. Ang ini nga rebolusyon ang may sosyalista nga perspektiba kag tuyo nga sa dalayon magapasad sang pundasyon para sa komunismo. May duha ka hinganiban ang Partido agud lutuson ang kaaway sa subong nga halin-



tang sang rebolusyon—ang armado nga paghimakas kag pungsodnon nga nagahiliugyon nga prente. Armado nga paghimakas ang hinganiban sa pagrumpag sa paghari sang kaaway kag pag-agaw sang gahum pangpulitika. Samtang, ang pungsodnon nga nagahiliugyon nga prente ang hinganiban nga magapasiguro sa pinakamalapad nga suporta para sa armado nga paghimakas kag magabiak sa hanay sang kaaway agud mahamulag ang pinakamalain.

Kinahanglan mapasiguro sang Partido nga hugot nga hakson sang NPA ang tatlo ka integrado nga hilikuton sang inaway banwa—paglunsar sang armado nga paghimakas, pagpatuman sa rebolusyon agraryo kag pagtukod sa baseng masa—dira sa pabalodbalod nga pagsulong sang rebolusyon. Ang mga Pulang kumander kag hangaway dapat magpakamaayo sa paggamit sa estratehiya kag mga taktika sang gerilya nga pakig-away nga konsentrasyon, dispersal kag pagbalhin agud mabatoan ang dalagku kag sostenido nga mga kampanyang ensirkulo sang kaaway nga pwersa. Kinahanglan makahason sa paglunsar sang madinalag-on nga mga sandigan nga taktikal nga opensiba nga makapahuyang sa kaaway kag makaagaw sang

armas-luthang para sa dugang nga pag-armas sa mga bag-o nga rekrut sang NPA kag sa mga tukuron pa nga bag-o nga mga platun tubtob sa unahan nga makatukod sang bag-o nga mga laranangan gerilya sa tuyo nga mapalapad ang teatro sang inaway sa isla.

Ang aton prinsipal nga katuayan amo ang paglunsar sang mga sandigan nga taktikal nga opensiba, apang dapat makumbinar ang mga atritibo nga aksyon nga makatuga sang halit sa kaaway kag makapanubo sa moral sang ila mga soldado. Ang mga kompanya sang minahan, plantasyon kag *logging* nga ginapanagiyahan sang mga kompanya sang dumuluong kag mga dalagku nga komprador-agalon mayduta lehitimo man nga punteryahon sang mga taktikal nga opensiba tungod ginahuthot kag ginakuha sini ang super ganansya, gina-export ang mga hilaw nga materyales kag ginapahuyang ang pungsodnon nga ekonomiya, ginaguba ang palibot, ginawasak ang agrikultura kag ginaagaw ang mga duta sang mga mangunguma.

Sa subong naton nga kusog, samtang yara sa estratehikong dependsiba, kinahanglan mangin maayo sa pagbasa sa dalagan sang inaway, magpalibog sa kada sit-

wasyon kag hampangon ang mga kabaskogan agud malab-ot ang taktikal nga superyoridad batok sa kaaway. Importante ang pag-uyat sa disiplina kag mga pagsulundan sang NPA. Ipatuman ang mataas nga lebel sa pagsikreto, himuon nga bulag kag bungol ang kaaway kag pabakuron ang pang-masa nga paniktik kag kombataniktik.

### 3. Hatagan tum-ok ang paglunsar sang mga komprehensibo nga kampanyang masa ilabi na mga kontra-pyudal nga paghimakas!

Ang nagapanguna nga unod sang aton ginalunsar nga demokratiko nga rebolusyon sang banwa amo ang hambalanon sang duta. Paagi lang sa pagsabat sa demokratiko nga demanda sang mga mangunguma mapahulag sang Partido ang mayorya sang pumulu-yong Pilipino para sa armado nga paghimakas. Gamit ang kontra-pyudal nga makasahi nga linya sa kaumahan, ipatuman ang minimum nga reporma sa duta (pagpanubo sang arkila sa duta, karabaw, kag mga kagamitan para sa pagpanguma; pagpataas sa sweldo sang mga mamumugon

sa uma; pagdula sang usura; pagpauswag sa presyohanay sang mga produkto sa uma pabor sa mga mangunguma; kag pagpataas sa produksyon paagi sa indibiwal nga panikasog kag simple nga ko-operasyon) kag itukod ang baseng masa—mga organisasyon masa kag mga organo sa gahum pangpulitika.

Ang kontra-pyudal nga paghimakas ang mangin alagyan man para sa pagrekober sa baseng masa nga ginbiyaan anay sa tunga sang dalagku nga mga operasyon kombatan sang kaaway kag pagbuka sa kakugmat sa mga komunidad sang mangunguma nga ginsabwag sang militarisasyon sa kaumhan. Kinahanglan mahanas ang mga kadre sang Partido, ilabi na ang mga pamatan-on, sa pagpamuno kag pagtaktisa sang mga kontra-pyudal nga paghimakas kag iban pa nga mga kampanyang masa. Sa mga paghimakas masa mapatuhaw ang pinakaabanse nga mga aktibista, lider masa, kag kadre sang Partido. Mangin bubon man ini sang mga pinakamaayo nga mga kumander kag hangaway sang banwa.


Kinahanglan updan sang pag-

pataas sa pangpulitika nga kamuklatan ang paglunsar sang masang kampanya. Maukod nga ilunsar ang mga pagtuon sa balayon sang PADEPA. Ipasiguro ang paghatag sa Sosyedad kag Rebolusyon Pilipino, Pagtulun-an sang Aktibista, mga Espesyal nga Kursong Masa kag Rebolusyonaryo nga Giya sa Reporma sa Duta. Maglunsar man sang kampanya sa pagtuon sang CARHRIHL kag *draft* sang NDFP sa Comprehensive Agreement on Social and Economic Reforms (CASER). Dapat tatapon sang mga kadre nga gin-asayn sa hilikuton pang-edukasyon ang mga nahatag nga pagtuon sa mga masa agud indi ini magpasulit-sulit kag ipasiguro nga may yara sang mga materyales para sa pagtuon ilabi na ang mga *printed* nga kopya sang mga pagtuon.

Magpadamu sang mga instruktur paagi sa paglunsar sang mga paghanas kag maghimo sang programa sa pagtukod sang mga *mobile school* agud mas mapasangkad ang mahatagan sang mga pang-Partido kag pulitikal nga mga pagtuon sa tunga sang mga operasyon militar sang AFP sa kaumhan. Ang mga instruktur ki-







nahanglan mapisan sa dugang pagtuon sa rebolusyonaryong teorya kag magtuon man sa pagpaathag kag pagsolbar sa mga praktikal nga problema.

Kinahanglan maghanas sang mga makinaryas sa propaganda sa kaumhan kag kasyudaran para sa pagpukaw kag pagpataas sa kamuklatan pangpulitika sang mga masa, pagpaisog sa ila sa pag-atubang sa militarisasyon sa mga komunidad, kag pagpaathag sa mga pagpaniplang sang kaaway. Dapat mapaathag sa mga masa ang mga nagkalain-lain nga isyu kag pungsodnon-demokratiko nga analisis sini. Aktibo man nga sab-ton kag indi paghatagan ligwa ang mga kabutigan sang pasista mersenaryong AFP/PNP/NTF-El-cac kag iban pa nga makinaryas sang estado nga ginapalapta sa *mainstream media* kag *social media*. Isa ka kahublagan masa ang hilikuton propaganda kag dapat makalab-ot sa malapad nga masa.

#### **4. Isulong ang kahublagan masa sa kasyudaran!**

Kinahanglan palaparon kag pabaskugon ang kahublagan masa

sa kasyudaran dululungan sa kaumhan. Hangkat subong sa Partido ang pagpamuno sa isa ka kontra-imperyalista, kontra-pyudal kag kontra-pasista nga kahublagan nga magalanog sa bilog isla sa diin mangin sentro sang protesta ang kasyudaran.

Kinahanglan mangin maukod sa paghangop kon paano ginapalala sang *neoliberal* nga mga polisiya ang kabuhi kag palangabuhian sang mga mamumugon, mangunguma, mangingisda, imol nga taga-syudad kaangay sang mga drayber kag *vendor*, mga propesyunal, pamatan-on, kababainhan kag iban pa nga sektor agud epektibo nga mapukaw, maorganisa kag mapahulag sila sandig sa ila nga mga pangkabilogan kag sektoral nga mga isyu kag demanda. Ang madalum nga paghangop sa subong nga kahimtangan ang magaresulta sa matalom kag maathag nga mga analisis nga hakson sang mga masa. Diri man maggwa ang husto nga mga metodo kag taktika sa pag-atubang sa mga nagkalain-lain nga isyu.

Makahason nga lab-oton ang mga ginapigos kag ginahimuslan

nga pumuluyo paagi sa matutom nga hilikuton masa kag solido nga pag-organisa. Tukuron ang mga likum nga organisasyon masa sa diin ang Partido ang yara sa alibutod sa hanay sang mga sandigan nga sektor kag nahanunga nga sektor. Pabakuron kag palaparon ang mga ini paagi sa edukasyon pangpulitika kag paglunsar sang mga pangmasa nga paghimakas kag kampanya.

Indi magpakampante sa gamay kag madugay na nga mga lider kag katapuan, sa hayag man ukon likom nga mga organisasyon. Dapat magpatuhaw sang mga bag-o nga mga aktibista kag mga lider masa kag, halin sa mga pinakababanse, magrekrut para sa Partido. Kinahanglan mapatudok sa ila ang malahaloon nga papel sang ligal nga kahublagan masa sa kasyudaran sa pagsulong sa armado nga paghimakas sa kaumhan. Magpadala sang matinggas nga mga kadre sang Partido ilabi na halin sa sahing mamumugon kag mga pamatan-on nga intelektwal sa NPA agud mangin mga Pulang kumander kag mga giya pangpulitika sang mga nagaluntad kag



tukuron nga mga larangan gerilya, indi magpakontento sa materyal nga suporta para sa armadong paghimakas.

Ang subong nga malala nga krisis pang-ekonomiya kag pang-sosyedad ang nagatuga sang matambok nga kahimtangan para sa mga ligal patriyotiko kag progresibo nga mga pwersa sa pagtukod sang mga alyansa sang nagkalain-lain nga mga sektor, tagsa ka mga sektor kag mga alyansa sandig sa isyu agud malab-ot ang pinakamalapad nga bahin sang pumuluyo. Ang nagahiliugyon nga prente ang hinganiban sang Partido nga aplikable sa nagkalain-lain nga ligal nga dagway sang paghimakas kasubongman sa mga rebolusyonaryo nga porma sang paghimakas. Ang sandigan nga alyansa sang mamumugon kag mangunguma ang mabakud nga pundasyon para sa tanan nga sahi sang alyansa—progresibo, patriyotiko kag malapad apang temporaryo. Ang ini tanan dapat

gamiton para mapalapad ang kusog kag impluwensya sang mga rebolusyonaryo nga pwersa, kag para mahamulag, mapahuyang kag mapapas ang kaaway nga sahi nga sa subong ginatiglawas sa nagbiak nga alyansa sang mga Marcos kag Duterte.

Tagaan man sang talupangod ang paglab-ot sa ordinaryo nga mga sundalo kag pulis sa hanay sang AFP kag PNP, subongman sa mga CAFGU kag iban pa nga paramilitar nga pwersa. Tungod sa terorismo sang estado nga nagatuga sang grabe nga kahalitang sa kaumhan kag bisan sa kasyudaran kag sa kagarok sang mga reaksyonaryo nga institusyon, may mga bahin sang militar, pulis kag ila mga pwersa paramilitar nga nagapangluya. Dapat magtukod sang demokratiko nga kahublagan sa mga patriyotiko kag progresibo nga mga elemento sa ila nga hanay.

Importante ang masunod nga pila ka tuig para sa Partido sa

isla sang Negros. Ini ang mangin panugod sa pagpanumbalik sa rebolusyonaryong kusog kag paglampas sa mga nagliligad nga kadalag-an. Ang KRPIN kag bug-os nga rebolusyonaryong pwersa sa isla ang handa sa pagbaton sa mga hangkat sa ika-55 nga tuig sang Partido. Magasingki ang pag-indakal sa sosyal nga bulkan sa isla samtang nagabaskog ang inaway banwa sang masang pigos kag ginahimuslan tubtub sa paglupok sini nga palatandaan sang bag-o nga panag-on sa kasaysayan sang pagrebolusyon sa isla sang Negros.

**Mabuhay ang demokratiko nga rebolusyon sang banwa!**

**Mabuhay ang masang pigos kag ginahimuslan!**

**Mabuhay ang Communist Party of the Philippines! *AP***